

Regulamento Asembleario

Título Preliminar. Do proceso

Artigo 0

Este regulamento artéllase por impulso da Promotora de Sumar Galicia. Este proceso constituínte estará dirixido pola propia Promotora de Sumar Galicia, que delega os labores técnicos na súa Permanente.

A Permanente propondrá, e a Promotora aprobará, un calendario, regulamento, orde do día e proposta de relatorios para guiar o proceso.

Título Primeiro. Das e dos participantes

Artigo 1

Poderán tomar parte como asembleístas con pleno dereito de voz e voto á Asemblea Xeralde Sumar Galicia todas aquelas persoas que teñan a consideración de membros de Movemento Sumar Galicia. Fíxase para esta asemblea unha cota xenérica extraordinaria e obligatoria de 10 €, cantidade que será cobrada a todas persoas membro de Sumar Galicia.

Aquelas persoas membro que estean exentas de cota ordinaria estarán exentas de abonar esta cota extraordinaria.

Artigo 2

As Asembleas Comarcais de Sumar Galicia estarán conformadas por todas as persoas dadas de alta como membros no momento de realizarse a xuntanza, así como de todas aquelas persoas que o fagan no mesmo momento de realizarse a Asemblea Comarcal. Empregarase, en todo caso, para o deseño comarcal a efectos do proceso, a división aprobada pola Promotora o 9 de marzo.

As persoas inscritas poderán participar, con voz e sen voto, nas deliberacións das Asembleas Comarcais.

Artigo 3

Poderán participar con plenos dereitos no proceso e posterior Asemblea Xeral todas as persoas membros que estean ao día de todas as súas cotas ordinarias. O censo defintivo pecharase ás 23.59 horas do día venres 15 de novembro, ou o venres da semana anterior ao día da asemblea (sete días antes) se esta tivera que mudar de data.

Artigo 4

Como observadores ou observadoras, con voz e sen voto, poderán asistir á Asemblea Xeral os e as inscritas convidados e convidadas.

Título Segundo. Da redacción de textos

Artigo 5

A Promotora aprobará, na mesma xuntanza que este regulamento, un calendario Asemblear, un equipo de relatores para cada texto e unha proposta de temáticas e ideas forza para a redacción dos mesmos.

Enviarase un primeiro borrador ou guión de relatorio ás Asembleas Comarcais, para recoller as súas propostas. Os relatores recollerán estas propostas e realizarán unha proposta definitiva de textos.

Estes relatorios definitivos remitiranse aos membros da Promotora para o seu debate, emenda e aprobación, podendo presentarse votos particulares aos mesmos se algún membro da Promotora o considerase axeitado. Posteriormente serán enviados ás Comarcas para o seu debate definitivo. Estes textos irán acompañados dos votos particulares sempre que os interesados ou interesadas membros da Promotora de Sumar Galicia, manifesten a súa vontade de mantelos.

Artigo 6

As Asembleas Comarcais debaterán os relatorios e votos particulares, podendo formular emendas á totalidade ou parciais. As emendas pasarán ao Plenario de ser apoiadas por máis do 50% da Asemblea Comarcal. Os votos particulares só serán debatidos, non podendo ser rexeitados.

Artigo 7

Na correspondente xuntanza da Promotora, será emitido un dictame sobre tódalas emendas. Estas poderán aceptarse, rexeitarse ou proporse unha transacción.

Título Terceiro. Do transcorrer da Asemblea

Artigo 8

A Promotora propondrá, e a Asemblea Xeral votará e emendará, de ser o caso, unha proposta de Orde do Día para a Asemblea.

Artigo 9

Os debates realizaranse en plenario, e en sesión de mañá e tarde, segundo se aprobe na Promotora de Sumar Galicia. A propia Asemblea Xeral Constituínte elixirá, a proposta da Permanente, unha Mesa do Plenario que dirixirá os debates da mesma. A citada Mesa estará composta por tres membros dos que un ou unha exercerá a Presidencia e dous a Secretaría, sendo estes últimos responsables de elaborar a acta da Asemblea.

Se o número de emendas fora tal que así o indicara, a Promotora, na mesma xuntanza de valoración de emendas, poderá acordar a existencia de comisións na sesión de mañá para axilizar o debate de emendas.

Artigo 10

A Promotora de Sumar Galicia designará as persoas encargadas de defender os textos oficiais na Asemblea.

Artigo 11

Se ningún membro do plenario asume a defensa dunha emenda, a mesma entenderase desbotada.

Artigo 12

No debate de cada emenda haberá unha quenda a favor e outra en contra, seguidas, se fose necesario a criterio da Presidencia da Mesa, dunha quenda de réplica.

Artigo 13

Relatores e emendantes poderán chegar a emendas transaccionais. Neste caso someteranse as dúas a votación, primeiro a orixinal e en segundo lugar a transaccional, sempre que alguén manifeste a súa vontade de manter o texto orixinal.

Artigo 14

Se unha emenda é aprobada, o seu texto substituirá ao correspondente do relatorio. Se todas foran rexeitadas, entenderase aprobado o texto orixinal do mesmo.

Artigo 15

Cada relatorio someterase á decisión final do pleno que os aprobará ou rexeitará no seu conxunto nunha soa votación. O pleno aprobará as propostas que acaden a maioría simple, isto é, contar con máis votos a prol que en contra.

Artigo 16

A Asemblea aprobará, coa orde do día, o límite para que os e as asembleístas presenten ante a Mesa do Plenario propostas de Resolución da Asemblea Nacional, que serán aprobadas pola Asemblea nunha votación ao efecto.

Artigo 17

A Asemblea Xeral Constituínte elixirá 30 membros para formar a Coordinadora Nacional. A elección farase por medio candidaturas pechadas, que deberán contar cunha lista de titulares igual ao número de postos a cubrir máis un mínimo de 3 suplentes, e deberá contar con alomenos un 50% de mulleres.

Deberá presentarse no email assemblea@movementosumar.gal entre as 00.00 horas do día 4 de novembro de 2024 e as 23.59 horas do día 15 de Novembro de 2024.

Todas as persoas que conformen as candidaturas deben estar dadas de altas como membros de Sumar Galicia e atoparse ao día das cotas no momento de rexistrar a candidatura.

As candidaturas incompletas ou presentadas fóra de prazo non se terán en conta. No caso de detectar erros na candidatura, concédese un prazo improrrogable de 48 horas para a súa subsanación. De non corrixirse no prazo sinalado, a candidatura será desbotada.

Artigo 18

No caso de se presentar máis dunha candidatura, a votación será secreta e os postos distribuiranse polo procedemento proporcional directo. Se só existise unha e ninguén solicita o contrario, a votación farase a man alzada, quedando proclamada se obtén máis votos a prol que en contra. Esta votación será secreta de ser solicitado polo 10% de asembleístas presentes.

Artigo 19

A Promotora de Sumar Galicia poderá presentar unha proposta de candidatura de Coordinadora Nacional se esta é aprobada previamente pola maioría simple dos seus membros.

Artigo 20

A Secretaría Xeral recaerá en quen encabece a lista máis votada, e a Presidencia sobre quen vaia de 2 na mesma lista.

Artigo 21

Posteriormente á elección da Coordinadora Nacional, o Pleno procederá á elección dos membros das Comisións de Garantías e de Disciplina, a proposta da Coordinadora recentemente eleita tendo que acadar un apoio asemblear de 3/5. Estas listas estarán compostas por 3 titulares e 2 suplentes, que non poderán tomar parte da Coordinadora

Nacional nin poderán ostentar ningún tipo de cargo orgánico ou recibir remuneración por parte da organización.

Título Cuarto. Do proceso Post Asemblear

Artigo 22

Cando cause baixa un membro da Coordinadora Nacional, o seu posto será cuberto polo seguinte membro da lista correspondente.

Artigo 23

A nova Coordinadora Nacional reunirse no prazo dun mes logo da Asemblea Xeral, para o cal as asembleas comarcais deberanse ter constituído e eleito ás correspondentes secretarías comarcais, que se incorporarán a este órgano.

Disposicións Adicionais

Primeira

A nova Coordinadora Nacional editará os textos aprobados no prazo máximo de tres meses trala celebración desta Asemblea Xeral Constituínte, cando menos en formato dixital.

Segunda

As emendas ao presente Regulamento non poderán ter carácter retroactivo. Polo tanto, o Regulamento, unha vez aprobado pola Promotora de Sumar Galicia, será válido e inemendable ata a constitución da Asemblea Xeral Constituínte, podéndose na propia Asemblea, na sesión plenaria, acordar modificacións que afecten, exclusivamente, aos procesos posteriores.

Terceira

A Promotora, na súa última xuntanza antes da Asemblea, que será posterior ao peche do censo, dará validación definitiva ao censo previo informe positivo sobre o estado de abonamento das cotas de membros.

Procederase tamén ao cobro, a partir desta data, da cota extraordinaria establecida no artigo 1. Estas cotas poden ser modificadas en contía ou suspendidas se as circunstancias e necesidades políticas, técnicas e organizativas así o aconsellaran, previo informe da Permanente.

Disposición Final

Durante o proceso preassemblear, a Permanente de Sumar Galicia estará facultada para interpretar este regulamento en caso de dúbida ou omisión. Durante o tempo da Asemblea será a mesa que a presida quen estará facultada para interpretar este Regulamento en casos de dúbida ou omisión.